

VENDIM
Nr. 1, datë 6.1.2017

PËR DHËNIEN E MANDATIT TË DEPUTETIT TË KUVENDIT, KANDIDATIT TË LISTËS SHUMEMËRORE TË PARTISË LËVIZJA SOCIALISTE PËR INTEGRIM NË QARKUN VLORË, PËR PLOTËSIMIN E VAKANCËS SË NJOFTUAR NGA KUVENDI I SHQIPËRISË

Komisioni Qendror i Zgjedhjeve në mbledhjen e datës 6.1.2017, me pjesëmarrjen e:

Denar Biba	kryetar
Hysen Osmanaj	Zv.kryetar
Bledar Skënderi	anëtar
Edlira Jorgaqi	anëtare
Gëzim Veleshnja	anëtar
Klement Zguri	anëtar
Vera Shtjefni	anëtare

shqyrtoi çështjen me,

OBJEKT: Për dhënien e mandatit të deputetit të Kuvendit, kandidatit të listës shumemërore të Partisë Lëvizja Socialiste për Integrim, në qarkun Vlorë, për plotësimin e vakancës së njoftuar nga Kuvendi i Shqipërisë pas heqjes së mandatit të deputetit të z. Shkëlqim Selami.

KËRKUES: Kuvendi i Republikës së Shqipërisë

BAZA LIGJORE: Neni 23, pika 1, germa “a”, neni 164, pika 2, i ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar.

KQZ-ja, pasi shqyrtoi dokumentacionin e paraqitur dhe dëgjoi diskutimet e përfaqësuesve të partive politike,

VËREN:

Nëpërmjet shkresës nr. 3979/1 prot., datë 30.12.2016, drejtuar KQZ-së, Sekretari Përgjith-shëm i Kuvendit znj. Albana Shtylla, njofton krijimin e vakancës për shkak të pavlefshmërisë dhe përfundimin e parakohshëm të mandatit deputetit të Kuvendit të Shqipërisë të z. Shkëlqim Selami, deputet i zonës zgjedhore qarku Vlorë.

Neni 164 i Kodit Zgjedhor përcakton se në rast të ndërprerjes së mandatit të deputetit, Kuvendi njofton KQZ-në për krijimin e vakancës dhe KQZ-ja merr vendim për dhënien e mandatit kandidatit të radhës në listën shumemërore të së njëjtës parti politike në zonën zgjedhore përkatëse, regjistruar sipas nenit 67 të Kodit Zgjedhor.

Kolegji Zgjedhor, me vendimin nr. 31, datë 2.8.2013 ka shpërndarë mandatet dhe ka përcaktuar kandidatët fitues për zonën zgjedhore qarku Vlorë, në zgjedhjet për Kuvendin të vitit 2013. Sipas vendimit të sipërcituar Partia Lëvizja Socialiste për Integrim për zonën zgjedhore qarku Vlorë për zgjedhjet për Kuvendin e Shqipërisë të datës 23 qershor 2013 ka fituar 1 mandat dhe kandidati fitues nga lista shumemërore e Partisë Lëvizja Socialiste për Integrim për qarkun Vlorë, është si më poshtë: me numër rendor 1 (një) z. Shkëlqim Bashkim Selami.

Rezulton se lista shumemërore e Partisë Lëvizja Socialiste për Integrim në qarkun e Vlorës i plotëson të gjitha kriteret e përcaktuara në nenin 67 të Kodit Zgjedhor, duke përfshirë dhe kriterin e gjinisë. Në këto kushte, zëvendësimi i vakancës do të bëhet sipas përcaktimeve të nenit 164, pika 2, fjalë e parë. Gjithashtu, konstatohet se vakanca nuk i përket një mandati të fituar sipas pikës 6, të nenit 67, të Kodit Zgjedhor, për të zbatuar përjashtimin e përcaktuar në nenin 164, pika 2, të Kodit Zgjedhor, fjalë e dytë.

Për sa më sipër, mandati i ndërprerë duhet t'i kalojë kandidatit vijues të listës së Partisë Lëvizja Socialiste për Integrim në zonën zgjedhore qarku Vlorë.

KQZ-ja, me vendimin nr. 341, datë 11.5.2013, “Për miratimin e listave shumemërore të Partisë

Lëvizja Socialiste për Integrim, pjesëtare e Koalicionit “Aleanca për Shqipërinë Europiane” për zgjedhjet për Kuvendin e Shqipërisë 2013”, ka miratuar listën shumemërore të Partisë Lëvizja Socialiste për Integrim për 12 zonat zgjedhore.

Sipas listës shumemërore të Partisë Lëvizja Socialiste për Integrim për qarkun Vlorë kandidati i radhës është kandidati me numër rendor 2 (dy) zoti Flamur Rrapo Çelaj. Nga verifikimi i dokumentacionit të mësipërm rezulton se personit të cilit do t’i kalojë mandati si deputet për në Kuvendin e Shqipërisë nga lista shumemërore për të plotësuar vendin vakant të krijuar nga ndërprerja e mandatit të z. Shkëlqim Selami është z. Flamur Rrapo Çelaj, i cili renditet përkatësisht me numër rendor 2 (dy).

Referuar nenit 11, të ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”, vetëdeklarimi dhe verifikimi i kushteve të të dhënave në përputhje me këtë ligj, kryhet për çdo kandidat të listës shumemërore për zgjedhjet pararendëse, për Kuvendin, të cilit i takon të marrë mandatin e deputetit për vendin vakant, sipas Kodit Zgjedhor.

Në këto kushte, z. Flamur Rrapo Çelaj, duhet të depozitojë formularin e vetëdeklarimit në KQZ, si organi kompetent për administrimin, verifikimin, zbatimin e ndalimeve për zgjedhjen dhe emërimin në funksionin publike, deputet i Kuvendit.

Në zbatim të nenit 11, ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike” dhe kreut V, të vendimit të Kuvendit nr. 17/2016 “Për përcaktimin e rregullave të detajuara mbi zbatimin e ndalimeve të parashikuara në ligjin nr. 138/2015”, KQZ-ja bëri publikimin e formularit të vetëdeklarimit në faqen zyrtare të internetit dhe verifikimin e të dhënave në këtë formular.

KQZ-ja kërkoi informacion nga zyra e gjendjes civile dhe zyra e gjendjes gjyqësore për kandidatin për deputet në listën shumemërore të Partisë Lëvizja Socialiste për Integrim, qarku Vlorë me numër rendor 2 (dy).

Sipas informacionit të ardhur nga Zyra e Gjendjes Gjyqësore, në KQZ, rezulton se z. Flamur Rrapo Çelaj, kandidat për deputet në listën shumemërore të Partisë Lëvizja Socialiste për Integrim, qarku Vlorë, është i padënuar nga gjykatat shqiptare.

Nga verifikimi i të dhënave në formularin e vetëdeklarimit të z. Flamur Rrapo Çelaj, rezulton se nuk është deklaruar asnjë e dhënë që ka të bëjë me kushtet e ndalimit të zgjedhjes në funksionin e deputetit, sipas ligjit nr. 138/2015, “Për garantimin e integritetit të personave që zgjidhen, emërohen ose ushtrojnë funksione publike”.

Për sa më sipër, mandati i ndërprerë i përket kandidatit të radhës, pas z. Shkëlqim Selami, renditur me numër rendor 2 (dy) në listën shumemërore të Partisë Lëvizja Socialiste për Integrim në zonën zgjedhore qarku Vlorë, z. Flamur Rrapo Çelaj.

PËR KËTO ARSYE,

Komisioni Qendror i Zgjedhjeve, mbështetur në nenin 23, pika 1, germa “a” dhe nenin 164, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, i ndryshuar,

VENDOSI:

T’i japë mandatin e deputetit të Kuvendit të Republikës së Shqipërisë, kandidatit të radhës në listën shumemërore të Partisë Lëvizja Socialiste për Integrim qarku Vlorë, z. Flamur Rrapo Çelaj.

Ky vendim hyn në fuqi menjëherë dhe botohet në Fletoren Zyrtare.

Kundër këtij vendimi mund të bëhet ankim në Kolegjin Zgjedhor, pranë Gjykatës së Apelit Tiranë, brenda 5 (ditë) ditëve nga shpallja e këtij vendimi.

KRYETAR
Denar Biba

